

կողմից նւերներ էին հասնում ուղիղ Երևան կամ Փարիզի պատերազմական՝ Հայաստանի համար: Եւ ինչե՛ր ասես չէին ուղարկւում — զինուորական հագուստ ու սարք, դեղորայք, գրենական պիտոյքներ, ինքնաշարժ, սաւառնակներ, ուտելիք, հագնելիք, ամբողջ գրադարաններ, գրամեքենաներ, ծխախոտ, քինին, բժշկական գործիքներ, նկարներ, զարդարանքներ... Սկսեցին Հայաստանին անել մեծագումար կտակներ, նոր շէնքերի շինութեան խոստումներ, կազմել արդիւնաբերական խոշոր ծրագրեր:

Յիշենք միայն մի քանիսը, պատահաբար քաղած յիշողութիւնից. Եգիպտոսի գործարանատէր Մելքոնեանը ընդունեց Հայաստանի քաղաքացիութիւնը և իր ամբողջ հարստութիւնը—մի քանի միլիոն դոլար—կտակեց Հայաստանին: Հայաստանին նւիրեց իր փառահեղ տունը Թիֆլիսում — մէկ միլիոն դոլարի արժողութեամբ—յայտնի դրամատէր Ա. Մելիք-Աղաբեանը*): Բազուի յայտնի դրամատէր Արշակ Ղուկասեանի թողած կտակը՝ մօտ 8 միլիոն բուրլով՝ փախանցւեց Հայաստանին: Ստաւրոպոլի հայ դրամատէր Պոպովը իր ամբողջ հարստութիւնը — մօտ 25 միլիոն բուրլի — կտակեց Հայաստանի համալսարանին: Գ. Գիւլպէնկեանը խոստացել էր Հայաստանում կառուցել մի շարք պետական մեծ շէնքեր: Հ. Մելիքեանը պատրաստւում էր շինել Երևանում ժողովրդական Տուն: Պոլսի «Ժող. Զայն» թերթը օգ. 20-ին հաղորդում էր, որ Հայ Ռամկ. Կուսակցութիւնը Եգիպտոսում որոշել էր Հայաստանին մատուցանել 50 օդանաւ—«Ռամկավար Հայաստանի Օդային Տորմիդը»: Հ. Յ. Դաշնակցութիւնը Ամերիկայում ձեռնարկեց բանակի հանդանակութեան, որը տւեց աւելի քան կէս միլիոն դոլար. Երևան, բանակի համար, ուղարկւեց մեծ քանակութեամբ պարսիմատ ու պահածոյ: Հայաստանի համալսարանին և Հանրային Գրադարանին նւիրեցին մի շարք մեծարժէք գրադարաններ — Զոհրաբի, դր. Տաղաւարեանի, Գ. Յակոբեանի, Կ. Կոստանեանի, Յ. Յակոբեանի, բանաստեղծ Ա. Ծատուրեանի և այլն: Կարևոր գործ էր և «Մայիլեան Եղբայրների դիտական արշաւախումբը», որը մի շարք մասնագէտների միջոցով նիւթեր էր հաւաքում և ուսումնասիրում Հայաստանի տնտեսական հարստութիւնները: Այսպիսի օրինակներ դեռ կարելի է շատ բերել:

Եւ այս դեռ սկիզբն էր երկանց:

Կային, ի հարկէ, և վատ, չարաչահ տիպեր, որոնք աշխատում էին Հայաստանը շահագործել իրենց անձնական օգտին ու երբ հանդիպում էին կառավարութեան արգելքին, ամէն տեսակ սուտ ու զրպարտութիւններ էին տարածում Հայաստանի վարիչների մասին, մանաւանդ, յաճախ, հոլովելով նրանց ընկերվարական լինելը: Դրանց մասին էր գրում Դ. Անանունը իր թունաւոր տողերը, թէ՛

*) Այդ տունը 1920թ., բոլոր օրինական ձևակերպութիւնները կատարելուց յետոյ, փոխանցեց Հայաստանի Հանրապետութեան Թիֆլիսի դիւ. ներկայացուցչութեան, որը պատրաստում էր տեղափոխել նրա մէջ: Բոլշևիկների գալուց յետոյ, շատերի հետ այդ շէնքն էլ, բռնագրաւեց և այժմ Հայաստանին չի պատկանում: